

四庫全書

史部

欽定四庫全書

金史卷一百十五

元中書右丞相總裁托克托等修

列傳第五十三

完顏納新 崔立 聶天驤 特嘉烏新

完顏納新字正甫蘇呼之弟也登策論進士第仕歷清
要正大三年八月由翰林直學士充益政院說書官五
年轉吏部侍郎監察御史烏庫哩薩喇勒劾近侍張文

壽仁壽李麟之受敵帥饋遺詔納新鞫問得其姦狀上
曲赦其罪皆斥去朝論快之九月改侍講學士以御史
大夫奉使大元至龍駒河朝見太宗皇帝十二月還明
年六月遷吏部尚書復往八年春還朝廷以勞拜參知
政事天興元年春大兵駐鄭州海灘寺遣使招哀宗降
復以納新往乞和不許攻汴益急汴受圍數月倉庫匱
乏召武仙等入援不至哀宗懼以曹王額爾克出質請
罷攻冬十月上議親出捍禦以納新參知政事兼樞密

副使完顏薩尼雅布樞密副使兼知開封府權參知政
事總諸軍留守京師以翰林學士承旨烏克遜布希提
控諸王府同判大睦親府事兼都點檢內族哈昭管宮
掖事左副點檢完顏阿薩爾右副點檢溫都阿里副之
戶部尚書完顏珠赫兼裏城四面都總領御史大夫費
摩阿固岱兼鎮撫軍民都彈壓諫議大夫近侍行省左
右司郎中烏克遜納新兼知宮省事又以博斯呼為外
城東面元帥珠嘉耀珠南面元帥崔立西面元帥富珠

哩邁努北面元帥乙酉除拜定以京城付之又以戶部侍郎刁壁為安撫副使總招撫司規運京外糧斛設講議所受陳言文字以大理卿納哈塔德輝戶部尚書仲平中京副留守愛實總其事十二月辛丑上出京服絳紗袍乘馬導從如常儀留守官及京城父老從至城外奉辭有詔撫諭仍以鞭揖之蘇布特聞上已出復會兵圍汴初上以東面元帥李辛跋扈出怨言罷為兵部侍郎將出密諭納新等羈繫之上既行納新等召辛辛懼

謀欲出降棄馬踰城而走納新等遣人追及之斬於省門汴民以上親出師日聽捷報且以二相持重幸以無事俄聞軍敗衛州蒼黃走歸德民大恐以為不救時汴京內外不通米升銀二兩百姓糧盡殍者相望縉紳士女多行乞於市至有自食其妻子者至於諸皮器物皆煮食之貴家第宅市樓肆館皆撤以爨及歸德遣使迎兩宮人情益不安於是民間有立荆王監國以城歸順之議而二相皆不知也天興二年正月丙寅省令史許

安國指講議所言古者有大疑謀及卿士謀及庶人今
事勢如此可集百官及僧道士庶問保社稷活生靈之
計左司都事元好問以安國之言白納新納新曰此論
甚佳可與副樞議之副樞亦以為然好問曰自車駕出
京今二十日許又遣使迎兩宮民間洶洶皆謂國家欲
棄京城相公何以處之薩尼雅布曰吾二人惟有一死
耳好問曰死不難誠安社稷救生靈死方可也如不然
徒欲一身飽五十紅納軍亦謂之死耶薩尼雅布歎言

曰今日惟吾二人何言不可好問乃曰聞中外人言欲立二王監國以全兩宮與皇族耳薩尼雅布曰我知之矣我知之矣即命名京城百官明日皆聚省中諭以事勢危急當如之何有父老七人陳詞云云二相命好問受其詞白之納新顧曰亦為此事也且問副樞此事謀議幾日矣薩尼雅布屈指曰七日矣納新曰歸德使未去慎勿泄或曰是時外圍不解如在陷穽議者欲推立荆王以城出降亦紀季入齊之義况北兵中已有曹王

也衆憤二人無策但曰死守而已忽聞召京城士庶計
事納新拱立無言獨薩尼雅布反覆申諭國家至此無
可奈何凡有可行當共議之且繼以涕泣明日戊辰西
面元帥崔立與其黨富珠哩昌格韓鐸藥安國等為變
率甲卒二百橫刀入省中拔劍指二相曰京城危困已
極二公坐視百姓餓死恬不為慮何也二相大駭曰汝
輩有事當好議之何遽如是立麾其黨先殺薩尼雅布
次殺納新及左司郎中納塔塔德輝等餘見崔立傳劉

祁曰金自南渡後為宰執者無恢復之謀臨事相習低
言緩語互相推讓以為養相體每有四方災異民間疾
苦將奏必相謂曰恐聖主心困事至危處輒罷散曰俟
再議已而復然或有言當改革者輒以生事抑之故所
用必擇悞熟無鋒鋟易制者用之每北兵壓境則君臣
相對泣下或殿上發長吁而已兵退則大張具會飲黃
閣中矣因循苟且竟至亡國又多取渾厚少文者置之
台鼎宣宗嘗責丞相布薩齊錦近來朝廷紀綱安在齊

錦不能對退謂郎官曰上問紀綱安在汝等自來何嘗
使紀綱見我故正人君子多不見用雖用亦未久而遽
退也祁字京叔渾源人

贊曰劉京叔歸潛志與元裕之壬辰雜編二書雖微有
異同而金末喪亂之事猶有足徵者焉哀宗北禦以孤
城弱卒託之納新薩尼雅布二人可謂難矣雖然即墨
有安平君玉璧有韋孝寬必有以處此

崔立將陵人少貧無行嘗為寺僧負鉞鼓乘兵亂從上

黨公開為都統提控積階遙領太原知府正大初求入仕為選曹所駁每以不至三品為恨園城中授安平都尉天興元年冬十二月上親出師授西面元帥性淫姣常思亂以快其欲藥安國者管州人年二十餘有勇力嘗為嵐州招撫使以罪繫開封獄既出貧無以為食立將為變潛結納之安國健啖日飽之以魚遂與之謀先以家置西城上事不勝則挈以逃日與都尉楊善入省中候動靜布置已定召善以早食殺之二年正月遂帥

甲卒二百撞省門入內二相聞變趨出立拔劍曰京城危困二公欲如何處之二相曰事當好議之立不顧麾其黨張信之富珠哩昌格出省二相遂遇害馳往東華門道遇點檢溫都阿里見其衷甲殺之即諭百姓曰吾為二相閉門無謀今殺之為汝一城生靈請命衆皆稱快是日御史大夫費摩阿固岱諫議大夫左右司郎中烏克遜納新左副點檢完顏阿薩爾奉御莽格講議富察琦戶部尚書完顏珠赫皆死立還省中集百官議所

立立曰衛紹王太子從恪其妹公主在北兵中可立之
乃遣其黨韓鐸以太后命名從恪須臾入以太后誥命
梁王監國百官拜舞山呼從恪受之遂遣送二相所佩
虎符詣蘇布特納款凡除拜皆以監國為辭立自稱太
師軍馬都元帥尚書令鄭王出入御乘輿稱其妻為王
妃弟倚為平章政事侃為殿前都點檢其黨富珠哩昌
格御史中丞韓鐸副元帥兼知開封府事折希顏藥安
國張軍努並元帥師肅左右司郎中賈良兵部郎中兼

右司都事內府之事皆主之初立假安國之勇以濟事至是復忌之聞安國納一都尉夫人數其違約斬之壬申蘇布特至青城立服御衣儀衛往見之大帥喜飲之酒立以父事之既還悉燒京城樓櫓火起大帥大喜始信其實降也立託以軍前索隨駕官吏家屬聚之省中人自閱之日亂數人猶若不足又禁城中嫁娶有以一女之故殺數人者未幾遷梁王及宗室近族皆置宮中以腹心守之限其出入以荆王府為私第取內府珍玩

實之二月乙酉以天子袞冕后服上進又括在城金銀搜索薰灌訊掠慘酷百苦備至邸國夫人及內侍高祐京民李民望之屬皆死杖下溫都衛尉親屬八人不任楚毒皆自盡博索夫人右丞李蹊妻子皆被掠死同惡相濟視人如讐期於必報而後已人人竊相謂曰攻城之後七八日之中諸門出葬者開封府計之凡百餘萬人恨不早預其數而值此不幸也立時與其妻入宮兩宮賜之不可勝計立因諷太后作書陳天時人事遣皇

乳母招歸德當時昌進之徒爭援劉齊故事以冀非分者比肩接武三月壬辰立以兩宮梁王荆王及諸宗室皆赴青城甲午北行立妻王氏備仗衛送兩宮至開陽門是日宮車三十七兩太后先中宮次之妃嬪又次之宗族男女凡五百餘口次取三教醫流工匠繡女皆赴北四月北兵入城立時在城外兵先入其家取其妻妾寶玉以出立歸大慟無如之何李琦者山西人為都尉在陳州與鈕祜祿納新同行省事陳州變入京附崔立

妹婿折希顏娶瓜爾佳元之妻年二十餘有姿色立初
拘隨駕官家屬妻輿病而往得免琦娶之後有言其美
者立欲強之琦每見立欲奪人妻必差其夫遠出一日
差琦出京琦以妻自隨如是者再三立遂欲殺琦琦又
數為折希顏所折辱乃首建投立之謀李伯淵者寶坻
人本安平都尉司千戶美姿容深沉有謀每憤立不道
欲仗義殺之李齊諾者燕人嘗以軍功遙領京兆府判
壬辰冬車駕東狩以都尉權東面元帥立初反以齊諾

舊與敵體頗貌敬之數月之後勢已固遂視齊諾如部
曲然齊諾積不能平數出怨言至是與琦等合三年六
月甲午傳近境有宋軍伯淵等陽與立謀備禦之策翌
日晚伯淵等燒外封邱門以警動立是夜立殊不安一
夕百卧起比明伯淵等身來約立看火立從苑秀折希
顏數騎往諭京城民十五以上七十以下男子皆詣太
廟銜點集既還行及梳行街伯淵欲送立還二王府立
辭數四伯淵必欲親送立不疑倉卒中就馬上抱立立

顧曰汝欲殺我耶伯淵曰殺汝何傷即出匕首橫刺之洞而中其手之抱立處再刺之立墜馬死伏兵起元帥洪果薩哈殺范秀折希顏後至不知見立墜馬謂與人鬪欲前解之隨為軍士所斫被創走梁門外追斬之伯淵繫立屍馬尾至內庭號於衆曰立殺害劫奪烝淫暴虐大逆不道古今無有當殺之不萬口齊應曰寸斬之未稱也乃梟立首望承天門祭哀宗伯淵以下軍民皆慟或剖其心生噉之以三尸挂闕前槐樹上樹忽拔人

謂樹有靈亦厭其為所汙已而有告立匿宮中珍玩遂籍其家以其妻王花兒賜丞相鎮海帳下士初立之變也前護衛布希舒魯負祖宗御容五走蔡前御史中丞富察世達西面元帥博斯呼挈其家亦自拔歸蔡七月己巳以世達為尚書吏部侍郎權行六部尚書世達嘗為左司郎中同簽樞密院事充益政院官皆稱上意及上幸歸德遣世達督陳糧運陳變世達亦與脅從尋間道之汴至是徒往行在上念其舊錄用之左右司官因

奏博斯呼舒嚕亦宜任用上曰世達曲從非出得已然
朕猶少降資級以示薄罰彼博斯呼掌軍一面舒嚕宿
衛九重崔立之變曾不聞發一矢束手於人今雖來歸
待以不死足以示恩又安得與世達等博斯呼老矣量
用其子可也舒嚕但當酬其負御容之勞未幾以博斯
呼為北門都尉其子為本軍都統舒嚕復充護衛世達
字正夫泰和三年進士

論曰崔立納款使其開府庫籍人民以俟大朝之命可

也乘時僭竊大肆淫虐徵索橫暴輒以供備大軍為辭
逞欲由已歛怨歸國其為罪不容誅矣而其志方且要
求劉豫之事我大朝豈肯效尤金人者乎金俘人之主
帝人之臣百年之後適啟崔立之狂謀以成青城之烈
禍曾子曰戒之戒之出乎爾反乎爾者也豈不信哉

聶天驥字元吉五臺人至寧元年進士調汝陰簿歷睢
州司候封邱令興定初辟為尚書省令史時胥吏擅威
士人往往附之獨天驥不少假借彼亦不能害也尋授

吏部主事權監察御史夏使賀正旦互市於會同館外
咸有身貿易於其間者天驥上章曰大官近利失朝廷
體且取輕外方遂忤太后上出為同知汝州防禦使事
未赴陝西行尚書省驛召特旨遙領金安軍節度副使
兼行尚書省都事未幾入為右司員外郎轉京兆治中
尋為衛州行尚書六部事慶陽圍急朝廷遣宿州衛總
帥約赫德救之以天驥充經歷官圍解從別帥守邠帥
欲棄州而東天驥力勸止之不從帥坐是被繫逮天驥

降京北治中尋有訟其寃者即召為開封簽事旬月復
右司員外郎丁母憂未卒哭奪哀復職哀宗遷歸德天
驥留汴中崔立變天驥被創甚卧十餘日而其女舜英
謁醫救療天驥歎曰吾幸得死兒女曹乃為謁醫尚欲
我活耶竟鬱鬱以死舜英葬其父明日亦自縊有傳天
驥沉靜寡言不妄交起於田畝能以雅道自將踐歷臺
省若素宦然諸人多自以為不及也


持嘉烏新字大用上京人當襲其父穆昆不願就中明

昌五年策論進士第後選為尚書省令史吏部主事監察御史言諸王駙馬至京師和買諸物失朝廷體有詔禁止遷鎮南將軍節度使息州刺史耕鞠場種禾兩禾合穗進於朝特詔褒諭改丹州遷鄭州防禦使權許州統軍使丞相高汝礪嘗薦其才可任宰相元光二年正月召為戶部侍郎未幾權參知政事二月為戶部尚書權職如故三月拜參知政事兼修國史詔諭近臣曰烏新資稟純質事可倚任且其性孝朕今相之國家必有

望汝輩當效之也正大元年五月拜尚書右丞哀宗欲
修宮室烏新極諫至以臥薪嘗膽為言上悚然從之同
判睦親府內族薩哈連交結中外久在禁近哀宗為太
子有定策功由是頗惑其言復倚信日深臺諫每以為
言太后嘗戒敕曰上之騎鞠舉樂皆汝教之再犯必杖
汝哀宗終不能去烏新諫曰薩哈連姦諛之最日在天
子左右非社稷福上悔悟出為中京留守朝論快之五
年致仕居汴中崔立之變明日召家人付以後事望睢

陽慟哭以弓弦自縊而死時年六十三一子名棟齊沒
於兵間弟秉甫字正之

贊曰聶天驢素履清慎持嘉烏新天資忠諒在治世皆
足為良臣不幸仕亂離之朝以得死為願欲哀哉



金史卷一百十五

欽定四庫全書

史部

金史卷一百十六
八

詳校官國子監祭酒臣覺羅喜喜

內閣中書臣李彤覆勘

總校官舉人臣章維桓

校對官助教臣李巖

謄錄監生臣謝雲

欽定四庫全書

金史卷一百十六

元中書右丞相總裁托克托等修

列傳第五十四

圖克坦烏登

張升附

實嘉紐勒琿

木名實祿

富察官努

張升附

內族承立

一名慶舊努

烏哩附

圖克坦烏登不知其所始累官武勝軍節度使駐鄧州

尋遷中京留守知金昌府事駐洛陽鄧及洛陽烏登皆

城之且招亡命十人號熊虎軍以剽掠南鄙為事宋人亦時時報復邊民為之搔動烏登資性深刻而以大自居好設耳目凡諸將官屬下及民家細事令親暱日報之務為不可欺正大間以兵部尚書權參知政事行省事於徐州自恃得君論議之際不少假貸同列皆畏之天興元年正月朝廷聞大兵入饒風移烏登行省閩鄉以備潼關圖克坦拜扎為關陝總帥便宜行事拜扎馳入陝榜州民云淮南透漏軍馬慮其道由潼關勢不能

守縣鎮遷入大城糧斛輜重聚之陝州近山者入山寨避兵會阿里哈傳旨召烏登入援烏登遂與潼關總帥納哈塔和碩秦藍總帥都點檢完顏重喜高平都尉苗秀蕩寇都尉珠嘉某振武都尉張翼及虎威鷹楊葭州劉趙二帥軍十一萬騎五千盡撤秦藍諸隘之備從虢人陝同華閿鄉一帶軍糧數十萬斛備關船二百餘艘皆順流東下俄聞大兵近糧皆不及載船悉空下復盡起州民運靈寶硤石食粟游騎至殺掠不勝計又遣陝州

觀察副使兼規措轉運副使穆延蘇頁以船八十往運
潼關閬鄉糧行及靈寶北河夾灘義軍張信侯三集壯
士三百餘保老幼立水柵北將古魯罕扎乘淺攻之不
能克遇蘇頁船至即降大兵得此船遂破侯張殺戮殆
盡是時陝州同知內族達春願從行省征進烏登授以
帥職聽招在城民充軍達春厚擬官賞數日無一人乃
以烏登命招之得壯士八百宣差趙三三名偉亦依達
春招募偉人所知識不二日得軍八百餘號破敵軍烏

登忌偉得衆欲挾詐坑之完顏蘇哥時為同華安撫使
力諫乃止尋以偉權興寶軍節度使兼行元帥府事領
軍三百屯金鷄堡大兵既知潼關焚棄長驅至陝賀德
希不待命出城迎戰馬蹶幾為所獲烏登易以一馬遂
下令不復令一人出大兵亦去自此潼關諸渡船筏俱
盡偉亦無船可渡矣初烏登發闕鄉拜天賞軍人白金
三兩將校有差州之庫藏軍資器械為之一空期日進
發已而不行日造銀器及兵幕牌印陝州及鹽司牌亦

奪取之又欲劫州民財物以資軍蘇鄂諫之而止二月
月戊午乃行有李先生者諫曰方今大兵俱在河南河
北空虛相公可先取衛州出其不意彼知我軍在北必
分兵北渡京師即得少寬相公入援亦易為矣烏登大
怒以為泄軍機斬之於市遂行軍士各以老幼自隨州
中亦有關中河中遷避商賈老幼亦倚兵力從行婦女
皆嫁士卒軍中亦有強娶奪者是日軍出兩東門及南
門不遵洛陽路乃由州西南徑入大山冰雪中葭州劉

趙兩帥即日拔去大兵以數百騎遙躡其後明日張翼軍叛往朱陽入鹿盧關大兵追及降之山路積雪晝日凍釋泥淖及脛隨軍婦女棄擲幼稚哀號盈路軍至鐵嶺大兵潛召洛陽大軍從西三縣過盧氏所至燒官民廬舍積聚慮為金軍所據又反守鐵嶺以斷歸路金兵知必死皆有鬪志然已數日不食行二百里許困憊不支頗亦散走於是完顏重喜先降大軍斬於馬前鄭侗劫苗英降英不從殺之攜其首以降於是士卒大潰烏

登和碩提數十騎走山間追騎擒得皆殺之先是烏登嘗為鄧州節度使世襲穆昆洪果薩哈時為宣差都總領與烏登親厚故決計入鄧是役也安平盪寇鷹揚振威諸都尉及西安金鷄等軍脫走者百才一二三月蘇呼竄歸有報圖克坦伯嘉言行省至伯嘉出迎父老遮馬前哀訴云行省復來吾州碎矣願無出迎伯嘉曉之曰前日烏登欲劫此州為蘇呼力勸而止此行省非烏登乃蘇呼也父老乃聽伯嘉出城陝州自軍出日有逃

還者伯嘉皆撫納之所得及萬人伯嘉又募收所棄甲
仗若獲二副即以一與之其一官出直買之由是軍稍
振五月總帥副點檢延扎領軍復立商州總帥華州人
王某立虢州權刺史七月制旨召伯嘉入援以權西安
軍節度使行元帥府事阿布哈努色爾為金安軍節度
使關陝總帥九月鞏昌知府元帥完顏呼沙呼入陝州
詔拜參知政事行尚書省事以河中總帥府經歷李獻
能充左右司員外郎獻能字欽叔貞祐三年進士復立

山寨安撫軍民十月朔制旨召呼沙呼赴南陽留山寺以阿布哈努色爾權參知政事行省時趙偉為河解元帥屯金鷄堡軍務隸陝西行省月給糧以贍其軍明年五月麥熟省劄令偉計置兵食權罷月給十月偉軍食又盡屢白陝省云無糧可給偉私謂其軍言我與李員外郎有隙坐視我軍飢餓不為存恤於是自往永寧勸喻偉頗為小民所信往往獻糧或導其發藏南縣把隘軍提控以偉橫恣言於行省行省遣趙提控者權元帥

守永寧元村寨偉還金鷄十一月冬至大兵已攻破元村寨偉攻解州不能下於是密遣總領王茂軍士三十人入陝州匿菜園中凡三四日乘夜王茂殺北城邏卒舉號召偉軍八百渡河入城劫殺阿布哈努色爾李獻能提控布希某總領來道安因誣奏努色爾等欲反臣誅之矣朝廷知其冤而莫敢詰就授偉元帥左監軍兼西安軍節度使行總帥府事食盡括粟粟又盡以明年三月降大兵或謂偉軍餉不繼以劫掠自資一日詣李

獻能獻能斬之曰從宜破敵不易由是憾之乃乘努色
爾宴飲不設備選死士二十八人夜由後河灘踰城而
上取餅爐碎石擲屋瓦門扇為箭鏃聲州人疑叛軍多
不敢動遂開門納軍殺行省以下官屬二十一人獻能
最為所恨故被害尤酷偉之變絳州錄事張升字進之
大同人戶工部令史出身曾為漁陽簿遷絳州錄事謂
知識者曰我本小人受國家官祿今日國家遭不幸我
不能從反賊言訖赴水死岸上數百人皆嗟惜之及圖

克坦伯嘉鄭西之敗單騎間道數百里入京為上言烏
登等鐵嶺敗狀於是籍重喜和碩烏登家貲暴烏登為
罪首榜通衢云

實嘉紐勒琿本名實祿興定三年以河南路統軍使為
元帥右都監行平涼元帥府事先是陝西行省胥鼎言
平涼控制西垂實為要地都監鈕祜祿古爾錦材識凡
庸不閑軍務且以入粟補官遂得升用握重兵當方面
豈能服衆防秋在邇宜選才謀有宿望善將兵者代之

故以命紐勒琿十一月紐勒琿上言鎮戎赤溝川東西四十里地無險阻當夏人往來之衝比屢侵突金兵常不得利明年春當城鎮戎彼必出兵來撓乞於二三月間徵傍郡兵聲言防護且令廊鞏各屯兵境上示進伐之勢以掣其肘臣領平涼之衆由鎮戎而入攻其心腹彼自救之不暇安能及我如此則鎮戎可城而彼亦不敢來犯又所在官軍多河北山西失業之人其家屬仰給縣官每患不足鎮戎土壤肥沃又且平行臣裨將所

統幾八千人每以遷徙不常為病若授以荒田使耕且戰則可以禦備一方縣官省費而食亦足矣其餘邊郡亦宜一體措置上嘉納焉遷昌武軍節度使元光二年九月又言商洛重地西控秦陝東接河南軍務繁密宜選才幹之士為防禦使攝帥職以鎮之又舊來諸隘守禦之官並從帥府辟置其所辟者多其親暱殖產營私專事漁獵及當代去又復保留此最害之甚者宜令樞府選舉以革其弊又州之戍兵艱於餽運亦合依上屯

田以免轉輸之費又言每年防秋諸隘守者不過數十人餘衆盡屯保安石門大荆洛南以為應援中間相距遠至百里倉猝豈能徵集宜近隘築營徙見兵居之以待緩急又南邊所設巡檢十員兵卒千人此乃平時以詰姦細者已有大軍宜悉罷去朝廷略施行之天興元年二月以行樞密院事守歸德乙丑大元將特默岱率真定信安大名東平益都諸軍來攻是日無雲而雷有以神武秘略占之者曰其城無害人心稍安適慶善努

潰軍亦至城中得之頗有鬪志已巳提控張定夜出斫營發數砲而還定平日好談兵紐勒琿令自募一軍使為提控小試而勝上下遂恃以為可用初患砲少欲以泥或埽為之議者恐為敵所輕不復用父老有言北門之西一菜圃中時得古砲云是唐張巡所埋掘之得五千有奇上有刻字或大吉字者大兵晝夜攻城駐營于南城外其地勢稍高相傳是安祿山將尹子奇於此攻巡遠得睢陽時經歷冀禹錫及官屬王璧李琦傳瑜極

力守禦城得不拔方大兵圍城議決鳳池大橋水以護城都水官言去歲河決敖游垆時曾以水平量之其地與城中龍興塔平果決此口則無城矣及大兵至不得已遣招撫陳貴往決之纔出門為游騎所鈔無一返者三月壬午朔攻城不能下大軍中有獻決河之策者主將從之河既決水從西北下至城西南入故灘水道城反以水為固欲殺獻策者而不知所在四月以紐勒璉為總帥佩金虎符罷司農司以其官富察世達為集慶

軍節度使行六部侍郎溫特赫道僧歸德府同知李無
黨府判五月圍城稍緩頗遷民出城就食十二月哀宗
次黃陵岡遣奉職珠嘉塔克實布奉職權奉御紐祜祿
色埒默來歸德徵糧紐勒琿遣侍郎世達治中王元慶
權郎中儀封從宜完顏呼圖權元帥護送載糧千五百
石是月晦二更發船二年正月達蒲城東二十里六軍
給糧盡曰留船不聽歸且命張布為幄上遂用此舟以
濟及上來歸德隨駕軍往往出城就糧時城中止有馬

用一軍近七百人用山西人與李辛同鄉里嘗為辛軍
彈壓在歸德權果毅都尉車駕至授以帥職此軍外復
有官努忠孝軍四百五十人河北潰軍至者皆縱遣之
故城中惟此兩軍上時召用計事而不及官努故官努
有異心朝廷知兩人不協恐生變三月戊辰朔制旨令
宰相錫宴省中和解之是夜用撤備官努以兵乘之為
亂明日攻用軍用敗走被殺衆下城投水奪船而去者
斯須而盡官努在雙門驅知府紐勒琿至言汝自車駕

到府上供不給好醬亦不與汝罪何辭遂以一馬載之
令軍士擁至其家檢其家雜醬凡二十甕且出所有金
具然後殺之即提兵入見言實嘉紐勒琿等反臣殺之
矣上不得已就赦其罪且暴紐勒琿之惡後其姪大安
入蔡上言求湔雪上復其官語在烏庫哩鎬傳哈薩喇
烏達代紐勒琿為總帥軍變官努無意害烏達使二卒
召之道官努有善意烏達喜各以金十星與之同見官
努二卒復恐受金事泄亦殺之初河北潰軍至歸德糧

餉不給朝廷命富珠哩阿哈行總帥府事以親軍武衛
皆隸之往宿州就食軍士有不願者諄語道中朝廷聞
之使問其故或言願入京或陳州阿哈請從其願以券
給之軍心稍定既而令求諄語者阿哈得四人斬之國
子監前由是諸軍洶洶二月庚子夜劫府民武邦傑及
富察耀珠等凡九家一軍遂散數日遂有官努之變

富察官努少嘗為北兵所虜往來河朔後以姦事繫燕
城獄劫走夏津殺回紇使者得鞍馬資貨即自拔歸朝

廷以其種人特恩收充忠孝軍萬戶此軍月給甚優官
努日與羣不逞博為有司所劾事聞以其新自河朔來
未知法禁詔勿問伊喇布哈攻平陽官努請行論功第
一遷本軍提控佩金符三峯山之敗走襄陽說宋制使
以取鄧州自劾制使信之至與同燕飲已而知汴城罷
攻復謀北歸遣伊喇留格入鄧說鄧帥聶赫稱欲劫南
軍為北歸計留格以情告聶赫官努繼以騎卒十餘入
城議事聶赫欲就甕城中擒之官努知事泄即馳還見

制使得騎兵五百掠鄧之邊面小城獲牛羊數百宋人不疑官勢掩宋軍得馬三百至鄧州城下移書聶赫辨理屈直留馬於鄧而去乃縛忠孝軍提控姬旺詐為唐州太守械送北行隨營帳取供給因得入汴有言其出入南北軍行數千里而不懾其智略有可取者宰相以爲然乃使權副都尉朱幾提軍數百馳入北軍獵騎中生挾一回紆而還遂巡黃陵八谷等處劫牛羊糧資甚衆尋轉正都尉又以軍至黃陵幾獲鎮州大將於是中

外皆以為可用遂拜為元帥統馬軍天興元年十二月
從哀宗北渡上次黃陵岡平章博索率諸將戰官努之
功居多及渡河朔惟官努一軍號令明肅秋毫無犯明
年正月上至歸德知府實嘉紐勒琿以軍衆食寡懼不
能給請於上令河北潰軍至者就糧於徐宿陳三州親
衛軍亦遣出城就食上不得已從之乃召諭官努曰紐
勒琿盡散衛兵卿當小心是時惟官努忠孝軍四百五
十人馬用軍七百人留府中用本果毅都尉上至歸德

始升為元帥又嘗召之謀事而不及官努故官努始有
圖用之志是時大元將特默岱守歸德官努既總兵柄
私與國用安謀欲邀上幸海州及近侍局直長珠勒根
烏舍使用安迴附奏帖謂海州可就山東豪傑以圖恢
復且已具舟楫可通遼東上覽奏不從又嘗請上北渡
再圖恢復紐勒琿沮之自是有異心矣且一軍倚外兵
肆為剽掠官努不之禁於是左丞李蹊左右司郎中張
天綱近侍局副使李大節俱為上言官努有反狀上竊

憂之以馬軍總領赫舍哩阿里哈內族錫馨陰察其動靜與朝臣言及則曰我從官努微賤中起為大帥何負而反耶卿等勿過慮阿里哈錫馨知官努漸不能制反泄上意上亦懼官努馬用相圖因以為亂命宰執置酒和解之用撤備俄官努乘隙率其軍攻用用軍敗走官努亂殺軍民以卒五十人守行宮劫朝官皆聚於都水摩和納宅以兵監馬驅參知政事實嘉紐勒琿至其家悉出所有金貝然後殺之乃遣都尉馬實被甲持刃劫

直長把納新於上前上初握劍見實擲劍於地曰為我
言於元帥我左右止有此人且留待我實不敢迫遂巡
而退凡赦朝官左丞李蹊已下三百餘人軍將禁衛民
庶死者三千郎中完顏呼喇勒都事冀禹錫赴水死禹
錫字京用龍山人至寧元年進士仕歷州郡有能聲歸
德受兵禹錫為行院都事經畫守禦一府倚重聞變或
勸以微服免不從見害是日薄暮官努提兵入見言實
嘉紐勒琿等反臣殺之矣上不得已赦其罪以為樞密

副使權參知政事初官努之母自河北軍潰北兵得之至是上乃命官努因其母以計請和故官努密與特默岱議和事令阿里哈往言欲劫上以降特默岱信之還其母因定和計官努乃曰往來講議或乘舟中流會飲其遣來使者二十餘輩皆女直契丹人上密令官努以金銀牌與之勿令還營因知王家寺大將所在故官努畫斫營之策先是忠孝軍都統張姓者謂官努決欲劫上北降遂率本軍百五十人圍官努之第數之曰汝欲

獻主上我輩皆大朝不赦者使安歸乎官努懼乃以其
母出質云汝等若以吾母自北中來疑我與北有謀即
殺之我不恨張意稍解即以好語與之約曰果如參政
所言今後勿復言講和北使至即當殺之官努曰殺亦
可不殺亦可奏而殺之亦可張乃退官努即聚軍北草
場自言無反情今勿復相疑也遂畫斫營之策五月五
日祭天軍中陰備火槍戰具率忠孝軍四百五十人自
南門登舟由東而北夜殺外提邏卒遂至王家寺上御

北門繫舟待之慮不勝則入徐州而遁四更接戰忠孝
初小劫再進官努以小船分軍伍七十出柵外腹背攻
之持火槍突入北軍不能支即大潰溺水死者凡三千
五百餘人盡焚其柵而還遂真拜官努參知政事兼左
副元帥仍以御馬賜之槍制以勅黃紙十六重為筒長
二尺許實以柳炭鐵滓磁末硫黃砒霜之屬以繩繫槍
端軍士各懸小鐵罐藏火臨陣燒之焰出槍前丈餘藥
盡而筒不損蓋汴京被攻已嘗得用今復用之兵既退

官努入亳州留錫馨總其軍上御照碧堂無一人敢奏對者日悲泣云自古無不亡之國不死之君但恨我不知用人故為此奴所囚耳於是內局令宋齊諾與奉御烏克遜愛實納喇奇塔特紐祜祿溫綽密謀誅官努或言官努密令烏舍計構國用安魯上傳位恢復山東事不成則獻上於宋自贖反復之罪官努以己未往亳州辛酉召之不至再召乃以六月己卯還上諭以幸蔡事官努憤憤而出至於扼腕頓足意趣叵測上決意欲誅

之遂與內侍宋齊諾處置令費摩綽哈召宰相議事溫
綽伏照碧堂門間官努進見上呼參政官努即應溫綽
從後刺其肋上亦拔劍斫之官努中創投城下以走溫
綽叱竒塔特愛實追殺之忠孝軍聞難皆擐甲溫綽請
上撫慰之名呼李泰和授以虎符使往勞軍因召范察
遜王善爾白進阿里哈進先至殺之堂下阿里哈中路
覺其事悔發之晚為亂箭所射而死齊諾愛實竒塔特
皆授節度使世襲千戶溫綽兼殿前右衛將軍范察遜

王善爾忠孝軍元帥於是上諭雙門赦忠孝軍以安反
測除崖立不赦外其餘常所不原者咸赦之初官努解
睢陽之圍侍從官屬久苦飢窘聞蔡州城池堅固兵衆
糧廣咸勸上南幸惟官努嘗從點檢內族色埒默過蔡
知其備禦不及睢陽力爭以為不可故號於衆曰敢言
南遷者斬衆以官努為無君諷上早為計會其變遂以
計誅之後遣烏庫哩富察如蔡還言其城池兵糧果不
足恃上已在道無可奈何及蔡受兵始悔不用官努之

言特詔尚書省月給其母妻糧俾無失所錫馨既黨官
努一日率忠孝軍劫官庫金四千兩上命歸德治中溫
特赫道僧帥府經歷把納新鞫問錫馨伏罪下獄官努
變錫馨脫走殺總領完顏長樂於宮門殺道僧把納紳
於其家遂奔毫及忠孝軍首領數人烏舍使用安未還伺
亳州斬錫馨及忠孝軍首領數人烏舍使用安未還伺
於中路數其罪殺之

內族慶善努名承立字獻甫統軍使古紳之子平章博

索之從弟也為人儀觀甚偉而內恇怯無所有至寧初宣宗自彰德赴闕慶善努迎見于臺城宣宗喜遣先還中都觀變宣宗既即位以承立為西京副留守權近侍局直長進官五階賜錢五千貫且詔曰汝雖授此職姑留侍朕遇闕赴之仍給汝副留守祿此朕特恩宜知悉也貞祐初遷武衛軍副都指揮使兼提點近侍局呼沙呼專權僭竊嘗為宣宗言之後呼沙呼伏誅慶善努愈見寵幸以為殿前右副都點檢三年大元兵圍中都詔

以慶善努為宣差便宜都提控率所募兵往援俄為元帥右都監行帥府事兼前職四年知慶陽府事兼慶原路兵馬都總管以所獲馬馳進詔諭曰此皆軍士所得即以與之可也朕安用哉後勿復進因令徧諭諸道帥府焉興定元年正月大元兵及夏人迴經寧州慶善努以兵邀擊敗之以功進元帥左都監兼保大軍節度使行帥府事於鄜州二年五月夏人率步騎三千由葭州入寇慶善努以兵逆之戰于馬吉峰殺百餘人斬酋首

二級生擒數十人獲馬三十餘疋三年四月夏人據通
秦寨慶善努遣提控納哈塔邁珠討之夏人以步騎二
萬逆戰邁珠擊敗之夏人由葭蘆川遁去斬首八百級
俄而復攻寨據之慶善努率兵與戰斬首五千級復其
寨詔賜慶善努金帶一將士賞賚有差四年四月破夏
兵于宥州斬首十餘級遂圍神堆府慶善努四面攻之
士卒方登陴援兵大至復擊走之正大四年李全據楚
州詔以慶善努為元帥同總帥完顏額爾克將兵守盱眙

且令城守勿出戰已而全軍盱眙界二帥迎敵大敗死者萬餘人委棄資仗甚衆時軍無見糧轉輸不繼民疲奔命愁歎盈路諸相不肯正言樞密判官白華拜章乞斬之以謝天下不報降為定國軍節度使又以受賂奪一官八年正月鳳翔破兩行省徙京兆居民於河南令慶善努以行省守之時京兆行省止有病卒八百瘦馬二百承立懼不能守屢上奏請還每奏一帖附其兄博索一書令為地朝廷不許十月慶善努棄京兆還朝留

同知乾州軍州事保義軍提控苟琪守之慶善努行至
閬鄉哀宗遣近侍費摩齊錦授以黃陵岡從宜不聽入
見未幾代圖克坦烏登行省事於徐州天興元年正月自
徐入援選精銳一萬五千與徐帥完顏鄂倫統之將趨
歸德義勝軍總領侯進杜政張興等率所部三千人降
大兵慶善努留睢州三日不敢進聞大兵且至懼此州
不可守退保歸德二月行次楊驛店遇薩納台軍遂潰
鄂倫戰死慶善努馬躓被擒惟元帥郭恩都尉烏陵阿

阿敦率三百餘人走歸德大兵以一馬載慶善努擁迫而行道中見真定史帥承立問曰君為誰史帥言我真定五路史萬戶也承立曰是天澤乎曰然曰吾國已殘破公其以生靈為念及見大帥特默岱誘之使招京城不從又偃蹇不屈左右以刀斫其足折亦不降即殺之議者以承立累敗不能解其軍職死有餘責而能以死報國亦足稱云初睢州刺史張文壽聞大兵將至遷旁縣居民入城大聚芻粟然無固守意日夜謀走以自便

既而聞承立入援即以州事付其僚佐託以應援徐兵
夜啓關挈家走歸德慶善努以為行部郎中死楊驛俄
大兵圍睢州以無主將故破殘之甚也鄂倫丞相薩布
之姪元光間例以諸帥為總領鄂倫以丞相故獨不罷
金朝防近族而用疎屬故博索承立鄂倫輩皆腹心倚
之

贊曰官努素行反側倏南倏北若壘斷然哀宗一旦倚
為腹心終為所制照碧之處何異幽囚其事與梁武侯

景大同而小異圖克坦烏登慶善努為將皆貪宜數取
敗紐勒琿無大失行而死於官努哀宗猶暴其罪寃哉

金史卷一百十六

欽定四庫全書

金史卷一百十七

元中書右丞相總裁托克托等修

列傳第五十五

圖克坦伊都 鈕祜祿經實

附 劉均

王賓

附 王進等

國用安 時青

圖克坦伊都不詳其始嘗累官為延安總管正大九年正月行省事於徐州時慶善努撤東方之備入援未至

睢州徐邳義勝軍總領侯進杜政張興率本軍降大兵
於永州辛丑大兵守徐張盆渡伊都到官才三日懼兵
少不能守即令伊喇長壽率甲士千人迎大兵長壽軍
無紀律大兵掩之一軍皆覆徐危甚伊都籍州人及運
糧婦兵得萬人乙巳大兵傅城燒南關而去侯進既降
北即以為京東行省進遂請千人來襲二月庚申未明
大兵坎南城而上守者皆散走城中大呼曰大兵入南
門矣伊都聞之不及甲率州署夜直兵三百由黃樓而

南力戰禦敵亂定遷賞有差由是軍勢稍振復奪張盆
渡敗蕭縣破白塔戰於土山救被俘老幼五千還徐既
而侯進亡命駐靈壁杜政張興亦慮為北所害窮窘自
歸伊都撫而納之興留徐杜政還邳州伊都資稟仁厚
持大體二子兩姪為軍將頗侵漁軍民青州人王祐為
埽兵總領將兵千七百人伊都常倚之雖有過亦不責
以故祐亦橫恣與河間張祚下邑令李閏義勝都統豐
紳遙授永州刺史成進忠輩乘軍政廢弛城中空虛以

六月丁巳夜燒草場作亂時張興臥病祐恐事不成起
興與同行伊都疑左右皆叛挈妻子縋城而出就從宜
重僧努及東面總領劉安國軍張興推祐為都元帥復
懼祐圖已遂誅祐并張祚殺之因大掠城中壬戌國用
安以行山東路尚書省事率兵至徐張興率甲士迎之
用安輕騎而入執興與其黨十餘人斬之于市遂以豐
紳為元帥兼節度使主徐州伊都窘無所歸乃奔宿州
節度使赫舍哩阿古以伊都為人所逐不納乃與諸將

駐于城南時宿之鎮防軍有逃還者阿古以為叛歸亦
不納城中鎮防千戶高拉格結小吏郭仲安謀就徐州
將士內外相應以取宿因歸楊妙真甲戌夜半開門納
徐州總領王德全及妻弟高元格軍劉安國尋亦入城
縛阿古父子殺之州中請伊都主帥府事伊都不從曰
吾國家舊人為將帥亦久以資性疎迂不能周防遂失
重鎮今大事已去方逃罪不暇豈有改易髻髮奪人城
池以降外方乎即日率官吏而行至穀熟東遇大兵不

屈而死徐州既歸海州邵帥烏凌阿某亦讓印於杜政
遂送款於用安已而州州王德全劉安國亦送款海州
惟伊都不改髻髮以至於死云

鈕古祿經實不知其始正大中累官亳州節度使開興
元年正月己丑游騎自鄧至亳鈔鹿邑營於衛真西北
五十里鹿邑令高昂霄知太康已降即夜趨亳道出衛
真呼縣令楚珩同行珩知勢不支即明諭縣人避遷之
意遂同走亳丁未二邑皆降是日軍至亳州城下州止

有單州共四百人號鎮安軍提控楊春邢某都統戴興
屯已六年經實悉籍城中丁壯為軍修守具而大兵亦
不暇攻四月擁降民而北城門閉不之知也五月縱遷
民收麥老幼得出丁壯悉留之民往往不肯留而遁數
日城為之空經實遣將領各詣所屬招之并將領亦不
返鎮安者皆紅襖餘黨力盡來歸變詐反覆朝廷終以
盜賊待之經實以遷民為軍蓋防之也及召外兵不至
乃請於歸德得甲騎百餘兩總領統之既至鎮安疑其

謀已乃乘將士新到不設備至夜掩殺殆盡經實出走
衛真楚珩與之馬而去州中豪貴悉被剽略劉堅者初
為大兵守城父亳州復擒之囚之於獄楊春謀欲北降
乃出之使為宣差乙巳大兵石總管入州改州為順天
府春為總管戴興為同知劉順治中留党項軍千人戍
之屬縣皆下惟城父令李用宜不降其妻子在亳州以
為質竟不屈而死春既據州與劉堅坐樓上召副提控
刑某刑剛直循理將士嚴憚之時臥病聞春亂流涕不

自禁春遣人舁致之邢指春大罵春慚惡無言春欲殺
經實家邢力勸止之且令給道路費逸之出城邢尋病
卒二年夏四月北省特默岱攻歸德春以戴興提精卒
以往獨與疲弱者守城州人王賓遂反正春渡河北遁
既而崔齊錦為亂殺王賓朝廷不得已以齊錦為節度
使就其兵杖入蔡八月劉順攻亳州破之齊錦為城父
令所殺未幾單州軍以州人殺其家屬召大兵來攻不
能拔殺屬縣民而去既渡河知毫人不疑復來攻州竟

為春所破是年六月宋人來攻春出降劉堅北走劉均者林慮人時為亳州觀察判官春既遂經實納款大兵脅均同降均佯應之歸其家取朝服服之顧謂妻子曰我起身刀筆仰荷上知始列朝著又佐大藩死亦足矣今頭顱已如此假使有十年壽何以見先帝於地下乎即仰藥而死

王賓字德卿亳州人貞祐二年進士外若曠達而深有謀畫初調蘭陵主簿辟虹縣令尋入為尚書省令史坐

事罷歸鄉里天興元年正月亳州軍變節度使鈕祐祿
經實出走楊春以州出降既而自以羸兵守之賓與前
譙縣尉王進魏節亨呂鈞約城中軍民復其州楊春遂
遁遣節亨詣歸德以聞哀宗嘉之授進節度使賓同知
節度使節亨節度副使鈞觀察判官楊春復以兵來攻
月餘不能拔即渡河而北六月哀宗遷蔡賓奉迎於州
北之高安上與語大悅恨用之晚擢為行部尚書世襲
穆昆上初至亳賓等適徵民丁負鐵甲入蔡及會計忠

孝軍家屬口糧故留參知政事張天綱董之就遷有功將士時毫之糧儲不廣賓等常吝惜軍士以此歸怨及運甲之役復不欲行會天綱與賓等於一樓上銓次立功等第鎮防軍崔富格王六十之徒擐甲譁譟登樓天綱問曰即欲見殺容我望闕拜辭賊曰無預相公即拽賓及呂鈞往市中鈞且行且跪涕泣俱下賓岸然不懼大叫曰不過殺我但殺但殺乃並害之節度副使魏節亨節度判官孫良觀察副使孫玳珠皆被害又數日殺

節度使王進進嘗應經實之募由間道入汴京納奏賞
以物不受又散家所有濟貧民以死自勵至汴以勞遷
本州判度判官賜以白金亦不受一時甚稱之有李喜
珠者本宿州重僧努下宣差天興二年四月進糧入歸
德將還聞亳州王進反正制旨以喜珠為振武都尉將
兵三千應援是時大兵圍亳州步騎十萬喜珠以衆寡不
敵獨與三人間道入城王進方議遷左軍林喜珠不可
進即以兵付喜珠大兵攻八日不能下五月壬子兵退

己未官努與阿里哈提忠孝軍百人至毫與諸將議遷
可否以為不可當留輜重於蔡選軍扈從入聖朵就武
仙軍遂入關中關中地利可恃又有郭哈瑪爾等軍在
西可恃甲子詔召官努還歸德不赴再召留其軍半於
毫乃赴六月壬辰車駕舟行至毫王進奏臣本軍伍不
知治體如李喜珠扈從入蔡則毫不守矣乞留治此州
詔以喜珠為集慶軍節度使便宜從事進領帥職七月
進死喜珠先往城父督糧餉聞亂遂不敢入毫後授宋

論曰金季之亂軍士欲代其偏裨偏裨欲代其主將即羣起而僨之無復忌憚伊都經實皆忠亮之士賓進才略尤足取焉而並不免於難惜哉

國用安先名安用本名咬兒淄州人紅襖賊楊安兒李全餘黨也嘗歸順大元為都元帥行山東路尚書省事天興元年六月徐州埽兵總領王祐義勝軍都統豐紳總領張興等夜燒草場作亂逐元帥圖克坦伊都安用率兵入徐州斬張興及其黨十餘人以豐紳為元帥兼

節度使主徐州宿州鎮防軍千戶高拉格與面面總帥
劉安國構徐州總帥王德全殺宿帥赫舍哩阿古以其
州歸海州邳州從宜烏凌阿某亦讓州於杜政送款海
州既而皆歸安用北大將阿勒楚爾聞安用據徐宿邳
大怒曰三州我當攻取安用何人輒受降遣信安張進
等率兵入徐欲圖安用奪其軍安用懼謀於德全劫殺
張進及海州元帥田福等數百人與楊妙真絕乃還邳
州會山東諸將及徐宿邳主帥刑馬結盟誓歸金朝既

盟諸將皆散去安用無所歸遂同德全安國託從宜重
僧努自通於朝廷重僧努遣人上奏安用以數州反正
功甚大且其兵力強盛材略可稱國家果欲倚用非極
品重權不足以堅其許國之心未報安用率兵萬人攻
海州未至衆稍散去安國因勸安用當赤心歸國安用
亦自知反復失計事已無可奈何於是復金朝衣冠妙
真怒其叛已又懼為所圖悉屠安用家走益都安用遂
選兵分將期必得妙真自此淮海之上無寧歲矣未幾

朝廷遣近侍局直長因世英都事高天祐持手詔至邳以安用為開府儀同三司平章政事兼都元帥京東山東等路行尚書省事特封兗王賜號英烈戡難保節忠臣錫姓完顏附屬籍改名用安賜金鑲銀印駝紐金印金虎符世襲千戶宣命勅樣牌樣御畫體宣空頭河朔山東赦文便宜從事且以彭王妃誥委用安招妙真用安始聞使者至猶豫未決以總領楊懋迎使者入堅于州廨問所以來世英對以封建事意頗順諸帥王杜輩

皆不欲宣言欲殺使者明日用安乃出見使者跪揖如
等夷坐定語世英曰予向隨大兵攻汴嘗於開陽門下
與侯摯議內外夾擊此時大兵病死者衆十七頭項皆
在京城若從吾計出軍中興久矣朝廷乃無一人敢決
者今日悔將何及言竟而起既而選人取朝廷賜物遍
觀之喜見顏色復與使者私議欲不以朝禮受之世英
等不可即設宴拜受如議以主事常謹等隨使者奉表
入謝上復遣世英天祐賜以鐵券一虎符六龍文衣一

玉魚帶一弓矢二封贈其父母妻誥命及郡王宣世襲
宣大信牌玉兔鶻帶各十聽同盟可賜者賜之使者至
邳用安迎受如禮始有入援意及聞上將遷蔡州乃遣
人以蠟書言遷蔡有六不可大率以為歸德還城皆水
卒難攻擊蔡無此險一也歸德雖乏糧儲而魚芡可以
取足蔡若受圍廩食有限二也大兵所以去歸德者非
畏我也縱之出而躡其後舍其難而就其易者攻焉三
也蔡去宋境不百里萬一資敵兵糧禍不可解四也歸

德不保水道東行猶可以去蔡若不守去將安之五也
時方暑雨千里泥淖聖體豐澤不便鞍馬倉卒遇敵非
臣子所敢言六也雖然陛下必欲去歸德莫若權幸山
東山東富庶甲天下臣略有其地東連沂海西接徐邳
南扼肝楚北控淄齊若鑾輿少停臣仰賴威靈河朔之
地可傳檄而定惟陛下審察上以其言示宰臣宰臣奏
用安反復本無匡輔志此必參議張介等議之業已遷
蔡議遂寢初世英等過徐王德全劉安國說之曰朝廷

恩命豈宜出自用安郡王宣吾二人最當得者乞就留
之世英乃留郡王宣世襲宣王帶各二由是與用安有
隙又懼為所圖皆不聽其節制十郡王者李明德豐紳
張瑀張友卓翼康琮杜政吳歪頭王德全劉安國也用
安必欲取山東累徵徐宿兵止以勤王為辭二帥不應
用安怒令杜政等率兵三千以取糧為名襲徐宿既入
城德全覺之就留杜政豐紳不遣用安愈怒謂德全安
國必有謀乃執桃園帥吳某等八九人下獄鞫問二帥

遣溫特赫張格以杜政豐紳欲襲取徐州白用安不聽
驅吳帥張格輩九人併斬之張格將死大呼曰國咬兒
汝無尺寸功受國家大封爵何負於汝而從杜政等變
亂又殺無罪之人今雖死當與汝辨於地下矣會上遣
臧國昌以密詔徵兵東方故用安假朝命聲言入援檄
劉國安為前鋒親率兵三千駐徐州城下招德全德全
終疑見圖不出繫豐紳於獄殺之遣杜政出城安國既
至宿州用安復召安國還安國不從獨與重僧努赴援

行及臨渙龍山寺用安使人劫殺之遂攻徐州踰三月不能下退歸漣水於是因世英以用安終不赴援乃還朝至宿州西遇大兵不屈而死事聞贈汝州防禦使既而用安軍食不給乞糧於宋宋陽許之即改從宋衣而私與朝使相親尋益乏食軍民多亡去乃命蕭均以嚴刑禁亡者血流滿道大元東平萬戶扎拉將兵至漣水遂降焉扎拉既渡河趨蔡州用安以詭計還漣水復叛歸於宋受浙東總管忠州團練使隸淮閫甲午正月聞

大兵圍沛用安往救之敗走徐州會移兵攻徐用安投
水死求得其尸剮面繫馬尾為怨家田福一軍鬻食而
盡用安刑狀短小無須喜與輕薄子游日擊鞠衢市間
顧盼自矜無將帥大體介字介甫平州人正大元年經
義進士第一時為用安參議初天祐等出汴微服間行
經北軍營幕至通許崔橋始有義軍招撫司官府去京
師二百里矣至陳州防禦使鈕祐祿納紳始立州事留
二日至項城縣令朱珍立縣事有士卒千二百人至泰

和縣縣令王義立縣已五月矣八月至宿州重僧努得報且知朝廷授以權宿州節度使兼元帥左都堅之命真彩輿儀衛出城五里奉迎時東方不知朝廷音問已八月矣官民見使者至且拜且哭有張顯者任俠尚氣知義理即謂天祐曰東方不知朝廷音問已數月今見使者百姓皆感動若不以聖旨撫慰之恐失東民之心我欲矯稱制者宣諭如何天祐書生守規矩不敢從但以宰相旨集州民慰撫之州民復大哭明日往徐州

時青滕陽人初與叔父全俱為紅襖賊及楊安兒劉二祖敗承赦來降隸軍中興定初青為濟州義軍萬戶是時叔父全為行樞密院經歷官興定二年冬全馳驛過東平青來見因告全將叛入宋全秘之頃之青率其衆入于宋宋人置之淮南屯龜山有衆數萬興定四年泗州行元帥府赫舍哩約赫德遣人招之青以書來書曰青本滕陽良民遭時亂離扶老攜幼避地草莽官吏不明此心目以叛逆無所逃死竄匿淮海離親舊去鄉邑

豈人情之所樂哉僕雖偷生寄食他國首丘之念未嘗
一日忘之如朝廷赦青之罪乞假邳州以屯老幼當襲
取盱眙盡定淮南以贖往昔之過約赫德復書曰公等
初亦無罪誠能為國建功全軍來歸即吾人也邳州吾
城以吾人居之亦何不可易曰君子見幾而作不俟終
日公其亟圖之生還父母之邦富貴終身傳芳後世與
其羈縻異域目以兵虜孰愈哉約赫德奏其事十月詔
加青銀青榮祿大夫封滕陽公仍為本處兵馬總領元

帥兼宣撫使青潛表陳謝復以邳州為請樞密院奏恐青意止欲得邳州可諭約赫德若青誠實來歸即當授之如審其詐可使人入宋境宣布往來之言及所授官爵亦行間之術也青既不得邳州復為宋守興定五年正月二十五日夜青襲破泗州西城提控王祿遇害是時時全為同簽樞密院事朝廷不知青襲破西城止稱宋人而已詔全往督泗州兵取西城全至泗州獲紅襖賊一人詰問之乃知青為宋京東鈐轄襲破西城全頗

喜乃殺其人以滅口約赫德晝夜力戰募死士以梯衝逼城青縋兵出拒不得前約赫德遣提控王應孫穴城東北隅青夜出兵來襲擊却之越二日復出又却之攻城益急青以舟兵二千合城中兵來犯約赫德營提控鄂爾多先知設伏掩擊青兵大敗溺淮水死者千人自是不復出矣王應孫穴城將及城中青隧地然薪逼出之青乘城指麾流矢中目餘衆往往被創樓堞相繼摧壞城中恟懼遂無固志二月二十六日夜青拔衆走遂

復西城元光元年二月全與元帥左監軍額爾克節制
三路軍馬伐宋詔曰卿等重任毋致不和以貽喪敗其
資糧可取規取失宜不能得之罪在額爾克既已得之
不能運致以為我用罪在全全與額爾克由穎壽進渡
淮敗宋人于高塘市攻固始縣破宋廬州將焦思忠兵
無何獲生口言宋詔時青來拒全兵全匿其事五月兵
還距淮二十里諸軍將渡全矯稱密詔諸軍且留收淮
南麥遂下令人獲麥三石以給軍衆惑之額爾克及將

佐勸之不聽軍留三日額爾克謂全曰淮水淺狹可以速濟時方暑雨若值暴漲宋乘其後不得完歸矣全力拒之從宜達哈伊實布色埒默李辛稍稍不平全怒曰額爾克一帥耳汝曹黨之汝曹致身至此皆吾之力吾院官也於汝無不可者衆乃不敢言是夜大雨明日淮水暴漲乃為橋渡軍宋兵襲之軍遂敗續橋壞全以輕舟先濟士卒皆覆沒宣宗下詔誅之遣官招集潰軍詔曰大軍渡淮每立功効諸將謬誤部曲散亡流離憂苦

朕甚閔焉各歸舊營勉圖自効又詔曰陣亡把軍品官子孫十五以上者依品官子孫例隨局承應十五以下十歲以上者依品從隨局給俸至成人本局差使無子孫官依例給俸應贈官賻錢軍人家口當養贍者並如舊制

贊曰金自章宗季年宋韓侂胄搆難招誘隣境亡命以撓中原事竟無成而青徐淮海之郊民心一搖歲遇饑饉盜賊蠡起相為長雄又自屠滅害及無辜十餘年麋

沸未息宣宗不思靖難復為伐宋之舉迄金之亡其禍尤甚簡書所載國用安時青等遺事至今仁人君子讀之猶蹙額終日當時烝黎如魚在釜其何以自存乎兵凶器也金以兵得國亦以兵失國可不慎哉可不慎哉

金史卷一百十七

欽定四庫全書

金史卷一百十八

元中書右丞相總裁托克托等修

列傳第五十六

苗道潤 王福 伊喇重嘉努

武仙 張甫 靖安民

郭文振 胡天作 張開

燕寧

苗道潤貞祐初為河北義軍隊長宣宗遷汴河北土人
往往團結為兵或為羣盜道潤有勇略敢戰鬪能得眾
心比戰有功略定城邑遣人詣南京求官封宰相難其
事宜宗召河南轉運使王擴問曰卿有智慮為朕決道
潤事今即以其眾使為將肯終為我盡力乎擴對曰兼
制天下者以天下為度道潤得眾有功因而封之使自
為守羈縻使之策之上也今不許彼負其眾何所不可
為宣宗顧謂宰執曰王擴之言實契朕心於是除道潤

宣武將軍同知順天軍節度使事貞祐四年復以功遷
懷遠大將軍同知中山府事再閱月復戰有功遷驃騎
上將軍中都路經略使兼知中山府事頃之加中都留
守兼經略使道潤前後撫定五十餘城興定元年詔道
潤恢復中都以山東兵益之道潤奏去年十一月臣遣
總領張子明招降蠡州通吉齊錦近日河北東路兵馬
都總管伊喇特爾格移軍蠡州襲破其軍殺數百人子
明亦被創臣將提兵問罪重以特爾格自拔來歸但備

之而已今欲復取都城乞無罪特爾格直令受臣節制庶可集事宣宗以問宰相奏曰道潤特爾格不協不可相統屬詔完顏寓行元帥府事督道潤復中都和輯特爾格軍初道潤與順天軍節度使李琛不相能兩軍土兵因相攻琛遣兵攻滿城完州道潤軍拒戰殺琛兄榮弟明等琛奏潞州提控烏林阿烏登承道潤指日謀侵害山東行省數諭道潤與臣通和竟不見從且殺臣兄榮弟明等恣橫如此將為後患又奏乞令河北州府官

不相統攝並聽帥府節制仍遣官增減諸路兵力使權均勢敵無相併吞則百姓安農畝矣道潤奏李琛以衆叛陷滿城攻完州琛亦奏道潤叛廷議以爲兩人失和故至于此令山東行省樞密院諭琛行省在彼自當俱聽節制何待帥府土兵本以義團結且耕且戰今乃聚之城寨遂相併吞百姓不安皆由官長無所忌憚使之然也嚴爲約束依時樹藝無致生事詔道潤與伊喇特爾格合兵撫定河北令諸道兵互相應援既而道潤與

賈全賈瑀互相攻擊詔道潤賈全王福武仙賈瑀分畫各路元帥府控制之彰德衛輝招撫司隸樞密院賈瑀既與道潤相攻已而詐為約和道潤信之遂伏兵刺殺道潤朝廷不能問一軍彷徨無所依提控靖安民乞權隸潞州行元帥府聽其節制時興定二年也右丞侯摯乞以保蠡完三州隸真定而蠡州舊受伊喇重嘉努節制一旦改隸真定恐因而交爭靖安民等願隸潞州乃令河北行省審處之經略副使張柔奏賈瑀攻易州寨

殺刺史馬信及其裨校奪所佩金符而去頃之張柔攻
賈瑀殺之道潤既死靖安民代領其衆是後乃封建矣
初貞祐四年右司諫珠嘉濟敦乞封建河朔詔尚書省
議事寢不行定興三年太原不守河北州縣不能自立
詔百官議所以為長久之利者翰林學士承旨圖克坦
鎬等十有六人謂制兵有三一曰戰二曰和三曰守今
欲戰則兵力不足欲和則彼不肯從唯有守耳河朔州
郡既殘毀不可一槩守之宜取願就遷徙者屯于河南

陝西其不願者許自推其長保聚險阻刑部侍郎鄂屯
哈斯罕三人曰河北於河南有輔車之勢蒲解於陝西
有襟喉之要盡徙其民是撤其藩籬也宜令諸郡選才
幹衆所推服能糾衆遷徙者願之河南或晉安河中及
諸險隘量給之食授以曠土盡力耕稼置僑治之官以
撫循之擇其壯者教之戰陣勅晉安河中守臣撤石嵐
汾霍之兵以謀恢復莫大之便兵部尚書烏凌阿與等
二十一人曰河朔諸州親民掌兵之職擇土人嘗居官

有材略者授之急則走險無事則耕種宣徽使伊喇光祖等三人曰度太原之勢雖暫失之頃亦可復當募土人威望服衆者假以方面重權能克復一道即以本道總管授之能捍州郡即以長佐授之必能各保一方使百姓復業提點尚食局舒穆魯穆請以高爵募民略同光祖議宰臣欲置公府宣宗意未決御史中丞完顏伯嘉曰宋人以虛名致李全遂有山東實地苟能統衆守土雖三公亦何惜焉宣宗曰他日事定公府無乃多乎

伯嘉曰若事定以三公就節鎮何不可者宣宗意乃決
四年二月封滄州經略使王福為滄州公河間路招撫
使伊喇重嘉努為河間公真定經略使武仙為恒山公
中都東路經略使張甫為高陽公中都西路經略使靖
安民為易水公遼州從宜郭文振為晉陽公平陽招撫
使胡天作為平陽公昭義軍節度使完顏開為上黨公
山東安撫副使燕寧為東莒公九公皆兼宣撫使階銀
青榮祿大夫賜號宣力忠臣總帥本路兵馬署置官吏

徵斂賦稅賞罰號令得以便宜行之仍賜詔曰乃者邊防不守河朔失寧卿等自總戎昭備殫忠力若能自効朕復何憂宜膺茅土之封復賜忠臣之號除已畫定所管州縣外如能收復鄰近州縣者亦聽管屬

王福本河北義軍積戰功累遷同知橫海軍節度使事滄州經略副使興定元年福遣提控張聚王進復濱棣二州以聚攝棣州防禦使進攝濱州刺史久之福與聚有隙聚以棣州附於益都張林興定三年九月福上言

滄州東濱滄海西連真定北備大兵可謂要地乞選重臣為經略使得便宜從事以鎮撫軍民朝廷以福初率義兵復滄州招集殘民今有衆萬餘器甲完具自雄一方與益都張林棣州張聚皆為鄰境今利津已不守遼東道路艱阻且其意本欲自為使但託詞耳因而授之使招集濱棣之人通遼東音問今若不許宋人或以大軍迫脅或以官爵招之將貽後悔宣宗以為然乃以福為本州經略使仍令自擇副使會福有戰功遷遙授同

知東平府事權元帥右都監經略節度如故興定四年
封為滄海公以清滄觀州鹽山無棣樂陵東光寧津吳
橋將陵阜城蓆縣隸焉四月紅襖賊李二太尉寇樂陵
棣州張聚來攻福皆擊却之李二復寇鹽山經略副使
張文與戰李二大敗擒其統制二人斬首二十級獲馬
三十匹七月宋人與紅襖賊入河北福嬰城固守益都
張林隸州張聚日來攻掠滄州危蹙福將南奔為衆所
止遂納款於張林東平元帥府請討福乞益河南步卒

七千騎兵五百滑濬衛州資助芻糧先定賞格以待有功朝廷以防秋在近河南兵不可往東平兵少不能獨成功待至來年春使東平帥府與高陽公併力討之乃止

伊喇重嘉努積戰功累官河間路招撫使遙授開州刺史權元帥右都監賜姓完顏氏興定四年與張甫俱封重嘉努封河間公以戲蠡安深州河間肅寧安平武強饒陽六家莊郎山寨隸焉興定末所部州縣皆不可守

元光元年移屯信安本張甫境內張甫因奏信安本臣
北境地當衝要乞權改為府以重之詔改信安為鎮安
府是歲與甫合兵復取河間府及安蠡獻三州與張甫
皆遷金紫光祿大夫二年重嘉努及張甫同保鎮安各
當一面別遣總領提領孫汝楫楊壽提控袁德李成分
保外垣遂全鎮安未幾重嘉努奏鎮安距迎樂堠海口
二百餘里實遼東往來之衝高陽公甫有海船在鎮安
西北可募人直抵遼東以通中外之意若賞不重不足

以使人今擬應募者特遷忠顯校尉授八品職仍賞寶
泉五千貫如官職已至忠顯八品以上者遷兩官升職
一等回日再遷兩官升職二等詔從之

武仙威州人或曰嘗為道士時人以此呼之貞祐二年
仙率鄉兵保威州西山附者日衆詔仙權威州刺史興
定元年破石海于真定宣差招撫使惟宏請加官賞真
授威州刺史兼真定府治中權知真定府事遷沼州防
禦使兼同知真定府事遙授河平軍節度使興定四年

遷知真定府事兼經略使遙領中京留守權元帥右都
監無何封恒山公以中山真定府沃冀威鎮寧平定州
抱犢寨欒城南宮縣隸焉同時九府財富兵強恒山最
盛是歲歸順于大元副史天倪治真定仙兄貴為安國
軍節度使史天祥擊之貴亦歸順于大元仙與史天倪
俱治真定且六年積不相能懼天倪圖已嘗欲南走宣
宗聞之詔樞密院牒詔之仙得牒大喜正大二年仙賊
殺史天倪復以真定來降大元大將薩納台討仙仙走

開月乘夜復入真定薩納台復擊之仙乃奔汴京五年
召見哀宗使樞密判官白華導其禮儀復封為恒山公
置府衛州七年仙圍上黨已而大兵至仙遯歸未幾衛
州被圍內外不通詔平章政事哈達樞密副使布哈救
之徙仙兵屯胡嶺關扼金州路八年十一月大元兵涉
襄漢哈達布哈駐鄧州仙由荊子口會鄧州軍天興元
年正月丁酉哈達布哈敗績於三峰山仙從四十餘騎
走密縣趨御寨都尉烏凌阿呼圖不納幾為追騎所得

乃舍騎步登嵩山絕頂清涼寺謂登封蘭若寨招撫使和卓僧秀曰我豈敢入汴京一旦有急縛我獻大國矣遂走南陽留山收潰軍得十萬人屯留山及威遠寨立官府聚糧食修器仗兵勢稍振三月汴京被圍哀宗以仙為參知政事樞密副使河南行省詔與鄧州行省色埒合兵入救八月至密縣東遇大元大將蘇布特兵過之仙即按軍睢山店報色埒曰阻澗結營待仙至俱進不然敗矣色埒急欲至汴不聽行至京水大兵乘之不

戰而潰仙亦令其軍散走期會留山仙至留山潰軍至者益衆哀宗罷色埒為中京留守詔仙曰色埒不知兵向使從卿阻澗之策豈有敗哉軍務一以付卿日夕以待戮力一心以圖後舉十一月遣刑部主事烏庫哩呼嚕召仙仙不欲行乃上疏陳利害請緩三月生死入援初色埒至鄧州承制授宣差總領洪果薩哈五朵山一帶行元帥府事兼行六部尚書及仙還留山惡薩哈權盛改為征行元帥屯比陽薩哈怨仙奪其權乃歸順于

大元大將蘇布特署薩哈守裕州薩哈乃詐以書約仙
取裕州可以得志仙信之薩哈乃報大元大將遣兵夾
擊敗仙于柳河仙跳走聖朶寨初沈丘尉曹政承制召
兵西山裕州防禦使李天祥不用命政斬之以徇仙至
聖朶謂政曰何故擅誅吾將政曰天祥違詔逗遛不行
政用便宜斬之仙怒曰今日宣差來起軍明日宣差來
起軍因此軍卒戰亡殆盡矣自今選甚人來亦不聽且
教兒郎輩山中休息又曰天祥果有罪待我來處置汝

何人輒敢殺之政曰參政柳河失利不知存亡天祥違詔何為不殺仙大怒叱左右奪政所佩銀牌令總領楊全械繫之會赦猶囚之及仙敗始得釋與楊全俱降宋是時哀宗走歸德遣翰林修選魏璠間道召仙行至裕州會仙敗于柳河璠矯詔招集潰軍以待仙仙疑璠圖已二年正月仙閱兵選鋒尚十萬璠曰主上旦夕西首望公公不宜久留於北仙怒幾殺璠璠及呼喇勒還歸德仙乃奏請誅璠哀宗不聽以璠為歸德元帥府經歷

官璠字邦彥渾源人貞祐二年進士云仙部將董祐有戰功詔賜虎符仙畏其偏已久不與佩祐憾之乃結官努欲殺仙猶豫未敢發近侍局使完顏四和有謀敢斷嘗徵兵鄧州禦牧使伊喇愛罕有異志四和以計誅之祐使謂四和曰仙終不肯入援祐等位卑力不能誅惟君為國家圖之四和曰已殺愛罕復殺武仙他日使者來人誰肯信不從仙知祐嘗有此謀使祐使河北其後竟殺之三月仙以聖朶軍食不足徙軍鄧州仰給于鄧

州總帥伊喇瑗鄧州倉廩亦乏乃分軍新野順陽淅川
就食民家遣講議官朱槩劉琢往襄陽借糧于宋制置
使史嵩之琢槩持兩端畏留廼以情告史嵩之曰仙兵
勢不復振矣且曰名為借糧實欲納款待將軍一諾耳
嵩之以為實然遣田俊持書報仙四月仙遣大理少卿
張伯直取糧于襄陽屯軍小江口以待之嵩之聞張伯
直至大喜謂仙送款矣發書乃謝狀也大怒留伯直不
遣仙自順陽入鄧州伊喇瑗畏逼以女女仙仙不疑納

之乃遷順陽鄧州糧盡瑗終疑仙五月瑗舉城降宋嵩之益知仙軍虛實使孟珙率兵五千襲仙軍于順陽是時仙令士卒刈麥供軍未至二里許始覺仙率帳下百餘人迎擊之孟珙不敢前俄頃軍士稍集有五六百人
大敗珙兵珙與數百人脫走生擒其統制統領數十人獲馬千餘至是槩琢妄說將納款于嵩之之語泄矣仙皆誅之伊喇瑗本名聶赫字廷玉世襲契丹明安累功鄧州便宜總帥既至襄陽使更姓名稱歸正人劉介具

將校禮謁制置使瑗大悔恨明年三月疽發背死孟珙
雖敗而去仙懼宋兵復來七月徙浙川之石穴是時哀
宗在蔡州遣近侍烏頁責仙赴難詔曰朕平日未嘗負
卿國家危難至此忍擁兵自恃坐待滅亡邪將士聞之
相視哽咽皆願赴難與國同生死仙懼衆心有變乃殺
馬牛與將士三千人歃血盟誓不負國家衆乃大喜無
何仙復謂衆曰蔡州道梗吾兵食少恐不能到且蔡不
可堅守縱到亦無益近遣人覘視宋金州百姓據山為

柵極險固廣袤百里積糧約三百萬石今與汝曹共圖之可不勞而下留老弱守此寨以為根本然後選勁勇趨蔡迎上西幸未晚也衆未及應即令戒行李取浙川泝流而上山路險阻霖雨旬日水湍悍老幼弱死者不可勝數糧食絕軍士亡者八九仙計無所出八月乃由荊子口東還自內鄉將入聖朶寨至峽石左右八疊秋林聞總領楊全已降宋留秋林十日乃遷太和九月至黑谷泊進退失據遂謀北走行部尚書盧芝侍郎石玠

不從芝字廷瑞河東人任子補官以西安軍節度使行
尚書玠字子堅河中人崇慶二年進士以汝州防禦使
行侍郎二人相與謀曰吾等知仙不卹國家久矣諫之
不從去之未可事至今日正欠蔡州一死耳假若不得
到蔡州死於道中猶勝死於仙也既去仙始覺追玠殺
之芝走至南陽為土賊所害甲午蔡州破糧且盡將士
大怨皆散去仙無所歸乃從十八人北渡河又亡五人
五月趨澤州為澤之戍兵所殺

張甫賜姓完顏氏初歸順大元涿州刺史李奇魯招之
興定元年正月甫與張進俱來降東平行省蒙古綱承
制除甫中都路經略使進經略副使二年苗道潤死河
北行省侯摯承制以李奇魯權道潤中都路經略使甫
與張柔為副頃之苗道潤之衆請以靖安民代道潤是
時張柔安民實分掌道潤部衆朝廷乃以奇魯為中都
東路經略使自雄霸以東皆隸之甫進與永定軍節度
使賈全不協以兵相攻奪據全地取全馬以遺經略使

李奇嚕奇嚕受之朝廷怪奇嚕不能和輯州府乃有向背召奇嚕別與官職詔東平蒙古綱講睦甫與賈全綱遣同知安武軍王郁博野令高常住往平之輒留奇嚕不遣因奏曰張甫本受奇嚕招降情意厚善今遣郁先與奇嚕議所以平之者然後可況甫等不識禮義之人奇嚕就徵則皆自疑恐生他變故不避專擅之罪詔從綱奏未幾賈全復以兵捕甫部民殺甫參議官邢瑋甫率兵攻之賈全敗走遂自縊死甫請符印以安輯部衆

詔與之無何李奇嚕歸順大元甫為中都東路經略使
遙授同知彰德府事權元帥右都監三年張進為中都
南路經略使甫奏真定兵衝乞遣重臣與恒山公武仙
併力守之不報及真定不守甫復奏權元帥右都監柴
茂保冀州水寨孤立無援若不益兵非臣之所知也四
年甫封高陽公以雄莫霸州高陽信安文安大成保定
靜海寶坻武清安次縣隸焉元光元年伊喇重嘉努不
能守河間甫居之信安是歲以功進金紫光祿大夫始

賜姓完顏二年二月張進亦遷元帥左監軍賜姓完顏
靖安民德興府永興縣人貞祐初充義軍歷穆昆千戶
總領萬戶都統皆隸苗道潤麾下以功遙授定安縣令
遷涿州刺史遙授順天軍節度使充提控興定元年遙
授安武軍節度使興定二年遷知德興府事中都路總
領招撫使是歲苗道潤死安民代領其衆行省承制以
涿州刺史李奇魯權中都路經略使三年詔奇魯自雄
霸以東為中都東路經略使自易州以西安民為中都

西路經略使西山義軍屯壘諸招撫皆隸焉四年遙授
知德興府事權元帥左監軍行中都西路元帥府事三
月安民上書曰苗道潤撫定州縣五十餘城其功甚大
西京路經略使劉鐸嫉其功反間賈瑀李琛與道潤不
協轉相攻伐竟以陰謀殺道潤鐸令所部劉智元等掠
鎮撫孫資孫招撫楊德勝家人二十餘口錮之山寨若
鐸常居此恐致敗事劉鐸亦遣副使劉璋詣南京自訴
且言安民侵人飛狐之境冒濫封拜誘惑人心強抑總

卷一百十八
領馮通等輸銀粟索飛狐總領王彥暉彈壓劉智元杜
貴欲充偏裨彥暉等拒之輒殺貴而杖智元竟驅彥暉
而去又言經略職卑以致從宜李栢山等日謀見害乞
許罷去廷議劉鐸本行招誘逋亡今乃與安民互相論
列以起爭端苗道潤死安民實代領其衆彥暉等軍本
隸道潤當聽安民節制乃召鐸還頃之封易水公以涿
易安肅保州君氏川季鹿三保河北江礬山寨青白口
朝天寨水谷懽谷東安寨隸焉十月安民出兵至礬山

復取檐車寨大元兵圍安民所居山寨守寨提控馬豹等以安民妻子及老弱出降安民軍中聞之駭亂衆議欲降以保妻子安民及經歷官郝端不肯從遂遇害詔贈金紫光祿大夫

郭文振字拯之太原人承安二年進士累官遼州刺史貞祐四年昭義節度使必喇阿魯岱請升遼州為節鎮廷議遼州城郭人戶不稱節鎮而文振有功當遷乃以本官充宣差從宜都提控興定元年詔文振接應苗道

潤恢復中都會道潤與賈全相攻而止文振治遼州深得衆心興定三年遷遙授中都副留守權元帥左都監行河東北路元帥府事刺史從宜如故文振招降太原東山二百餘村遷老幼于山寨得壯士七千分駐營柵防護秋穫文振奏若秋高無兵直取太原河東可復優詔許之十月權元帥右都監行元帥府事與張開合堅臺州兵復取太原四年詔升樂平縣為臯州壽陽縣西張寨為晉州從文振之請也文振上疏曰揚子雲有言

御得其道則天下狙詐咸作使御失其道則天下狙詐咸作敵有天下者審所御而已河朔自用兵之後郡邑蕭然並無官長武夫悍卒因緣而起以為得志僭越名位瓜分角競以相侵攘雖有內除之官亦不得領其職所為不法可勝言哉乞行帥府擅請便宜妄自誇張以尊大其權包藏之心蓋可知也朝廷因而撫之假權傳授至與各路帥府力侔勢均不相統屬陝西行省總為節制相去遼遠道路梗塞卒難聞知故飛揚跋扈無所

畏憚鄰道相望莫敢誰何自平陽城破以來河北不置
行省朝廷信臣不復往來布揚聲教但令伊喇行報而
已所司勞以酒食悅以貨財借其聲譽共欺朝廷姦倖
既行遂至驕恣變故之生何所不有此臣所以夙夜痛
心而為之憂懼也乞分遣公廉之官徧詣訪察庶知所
在利害之實伏見澤潞等處芻糧猶廣人民猶衆地多
險阻乞選重臣復直行省皆聽節制上下相維可臂指
使之則國勢日重姦惡不萌矣是時澤潞已詔張開規

畫不能盡用文振之言但令南京兵馬使珠嘉賽音行
帥府於懷孟而已是歲封晉陽公河東北路皆隸焉文
振奏孟州每以豪猾不逞之人攝行州事朝廷重於更
代就令主之去年伯特和攝刺史提控伯特安殺之奪
其職河東行省以陳景璠代安安內不能平因誣告景
璠死罪朝廷未及按問安輒逐之恥受臣節制宣言于
衆待道路稍通當隸恒山公節制今真定已不守安猶
向慕不已臣徵兵諸郡安輒詭辭不遣臣若興師是自

生一敵非國家之便也聞安有女臣輒違律令為姪孫
述娶之安遂見許臣非願與安為姻為公家計屑就之
耳自結親以來安頗循率以從王事法不當娶而輒娶
之敢以此罪為請宣宗嘉其意遣近臣慰諭之文振復
奏武仙所統境土甚大雖與林州元帥府共招撫之乞
更選本土州縣官重其職任同與安集可使還定宣宗
用其策五年文振奏臣所統嵐管隰石寧化保德諸州
境土闊遠不能周知利害恐誤軍國大計伏見葭州刺

史爪爾佳芬徹智勇過人深悉河東事勢乞令行元帥
府事或為本路兵馬都總管與臣分治詔文振就擇可
者處之便地仍受文振節制上黨公張開以厚賞誘文
振將士頗有亡歸者詔分遼潞粟賑太原饑民張開不
與文振奏其事詔遣使慰諭之文振復申前請以葭州
刺史爪爾佳芬徹分治嵐管以西諸州制可仍令防秋
後再度其宜文振請分上黨粟以贍太原詔文振與張
開計度頃之詔以石州隸晉陽公府元光元年林州行

元帥府惟良得罪召還文振奏近聞惟良召還臣竊以
為不可惟良在林州五歲政尚寬厚大得民心今茲被
召軍民遮路泣留其去未幾義尖之衆作亂逐招撫使
康瑋乞遣惟良還林州為便不許文振上書乞遣前平
章政事胥鼎行省河北諸公府帥府並聽節制詔諭百
姓使知不忘遺黎之意然後以河南陝西精銳併力恢
復不報文振復奏河朔百姓引領南望臣再四請於樞
府但以會合府兵為言公府雖號分封力實單弱且不

相統攝所在被兵朝廷不即遣兵復河北人心將以為
舉河朔而棄之甚非計也文振大抵欲起晉鼎為行省
定河北朝廷不能用二年詔文振應援史詠復河東是
歲遼州不能守徙其軍于孟州以部將郝安等為文振
副護汾山諸寨文振等公府詔不許頃之文振部將汾
州招撫使王遇與孟州防禦使納喇蒙古勒不相能復
徙衛州然亦不可以為軍迄正大間寓于衛而已

胡天作字景山管州人初以鄉兵守禦本州累功少中

大夫管州刺史興定二年遙授同知太原府事刺史如故是歲平陽失守改同知平陽府事三年復取平陽天作言汾潞皆置帥府平陽大鎮今稍完復所管州縣不下十萬戶復業者相繼不絕其過汾潞遠甚宜一體置之是時晉安嵐州皆有帥府乃以天作充便宜招撫使權元帥左都監四年封平陽公以平陽晉安府隰吉州隸焉天作請以晉安府之翼城縣為翼州以垣曲絳縣隸焉置平水縣于汾河之西朝廷皆從之初軒成本隸

程琢麾下琢死成率衆保隰州以為同知隰州軍州事
兼提控軍馬成增繕器甲招納亡命頗有他志是時隰
州方用兵未可制天作請增置要害州縣以分其勢隰
州之境蒲縣最居其衝可改為州隰州之仵城鎮可改
為縣選官守備詔升蒲縣為蒲州以大寧縣隸之仵城
鎮為仵城縣天作守平陽凡四年屢有功詔錄其子定
格為奉職元光元年十月青龍堡危急詔遣瓜爾佳寶
倫會張開郭文振兵救之次彈平寨東三十里不得進

知府事珠格和索哩總領提控王和各以兵歸順臨城索其妻子兵民皆潰執天作出天作已歸順詔珠和索哩子之南京者命天作子定格承應如故天作已受大元官爵佩虎符招撫懷孟之民定格聞之乃自經死贈信武將軍同知睢州軍州事詔張開郭文振招天作天作至濟源欲脫走先遣人奏表南京大元大將惡其反覆遂誅之天作死後宣宗以同知平陽府事史詠權行平陽公府事後封平陽公平陽初破詠父詐母蕭氏藏

於窟室索出之使詐招詠詐乃自縊死蕭氏逃歸詠妻
梗氏亦自死宣宗贈詐榮祿大夫京兆郡公諡成忠蕭
氏封京兆郡太夫人賜號歸義梗氏贈京兆郡夫人諡
義烈未幾詠乞內徙徙其軍于解州河中府

張開賜姓完顏氏景州人至寧末河北兵起開團結鄉
兵為固守累功遙授同知青州防禦事兼同知觀州事
貞祐四年開率所部復取河間府及滄獻二州十有三
縣開有宣府司留付空名宣勅二百道奏乞從權署置

就任所復州縣舊宮闕者補之詔遷同知觀州軍州事
開復青州乞輸鹽易糧詔與之糧遷觀州刺史權本州
經略使至是始賜姓完顏氏開奏乞許便宜及論淇門
安陽黎陽皆作堰塞水河運不通乞開發水道不報觀
州糧盡是歲秋徙軍輝州乞麥種三十石驢羸三百或
寶券二百貫戶部不與御史臺奏開自觀州轉戰來此
久著勞績欲令其軍耕種以自給有司計小費拒不與
乞斷自宸衷與之麥種若無牛可與給以寶券制可是

歲潼關不守被召入衛南京興定元年遙授澤州刺史
二年遙授同知彰德府兼總領提控三年充潞州招撫
使林州元帥府徙潞人實林州既復遣還開乞隸晉安
元帥府或與林州並置元帥府各自為治十月開以權
昭義軍節度使遙授孟州防禦使權元帥左都監行元
帥府事與郭文振共復太原四年封上黨公以澤潞沁
州隸焉五年詔復以涉縣為崇州從開請也元光元年
復取高平縣及澤州二年大戰壺關有功既而潞州危

急開奏封建公府以固屏翰今胡天作出平陽郭文振南徙河東公府獨臣與史詠而已乞升澤沁二州為節鎮以重守禦詔以澤為忠昌軍沁為義勝軍林州義尖寨衆亂逐招撫使康塘推杜仙為招撫使開請以盧芝瑞為副代領其衆又奏比聞郭文振就食懷孟史詠徙解州高倫遷葛伯寨各自保守民安所仰哉臣領孤軍內無儲待外無應援臣不敢避失守之罪恐益重朝廷之憂正大間潞州不守開居南京部曲離散名為舊公

與匹夫無異天興初起復與劉益為西面元帥領安平
都尉紀綱軍五千攻衛州敗績于白公廟是時哀宗走
歸德開與劉益謀收潰兵從衛不果遂與承裔西走皆
為民家所殺初置公府開與恒山公武仙最強後駐兵
馬武山遣人間道請糧二萬石用事者難之止給二千
石公府將佐得報皆不敢白開聞置酒召諸將曰朝廷
待某特厚今日與諸君一醉諸將問故曰頃以糧竭為
請祈二萬而得二千是吾君相不以武仙輩待我也是

時郭文振處開西北當兵之衝民貧地瘠開又不奉命以糧賑文振軍文振窮竄開勢愈孤以至於敗

燕寧初為莒州提控守天勝寨與益都田琢東平蒙古綱相依為輔車之勢山東雖殘破猶倚三人為重紅襖賊五公喜據注子垵率衆襲據沂州寧擊走之遂復沂州語在田琢傳寧既屢破紅襖賊招降胡七胡八引為腹心賊中聞之多有欲降者累官遙授同知安化軍節度使事山東安撫副使興定四年封東莒公益都府路

皆隸焉五年與蒙古綱王庭玉保全東平以功遷金紫光祿大夫還天勝戰死蒙古綱奏寧克盡忠孝雖位居上公祖考未有封爵身沒之後老稚無所衣食乞降異恩以勵節義之士詔贈故祖臯銀青榮祿大夫祖母張氏范陽郡夫人父希遷金紫光祿大夫母彭氏繼母許氏妻霍氏皆為范陽郡夫人族屬五十二人皆廩給之自益都張林逐田琢繼而寧死蒙古綱勢孤徙軍邳州山東不復能守矣

贊曰苗道潤死中分其地靖安民有其西之半中分以東者其後張甫有之然無北境矣大凡九公封建宣宗實錄所載如此他書載滄海公張進河間公伊喇重格易水公張進晉陽公郭棟此必正大間繼封如史詠繼胡天作者然不可攷矣

金史卷一百十八